



Comme S. Iean estant relegué en l'Isle de Patmos, eut reuelation des choses qui deuoient aduenir en l'Eglise.

LE liure de l'Apocalypse contient les choses que Dieu a reuelées à saint Iean, & saint Iean à l'Eglise, qui sont en partie les peines & trauaux que l'Eglise a enduré aux premiers temps, qu'elle endure à present, & qu'elle endurera aux derniers temps du regne de l'Antechrist. Ces choses furent reuelées à saint Iean l'Apostre, lors qu'il fut relegué par le commandement de l'Empereur Domitian en l'Isle de Patmos: & ce liure, comme dit S. Hierosme, contient autant de Sacremens que de paroles, & chaque parole a plusieurs intelligences cachées. Entre autres choses saint Iean décrit sept visions principales, qu'il recite aux sept Eglises d'Asie, qui sont designées par les sept Chandeliers d'or qu'il vid. Et ces visions signifient l'estat de l'Eglise vniuerselle, & combien de tribulations elle doit endurer; & l'intention de saint Iean est d'exorter l'Eglise à la patience qu'il faut garder: car la tribulation sera de briefue durée, & la recompense grande & eternelle. De tous les liures du nouveau Testament il n'y a que cettuy-cy qui soit prophetique.

S. Hierosme en son Prologue, & au Chap. 1. de l'Apocalypse.